



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Konferensia Imprensa

Periodo : Marsu 2009

Edisaun:

Arguidu Abuzu Sexual Hasoru Labarik Minoridade Hetan Liberdade Kondisional

Tuir horariu julgamentu, iha loron 16 Marsu 2009, Tribunal Distrital Suai (TDS) sei hala'o prosesu julgamentu ba kazu abuzu sexual hasoru labarik minoridade. Baze akuzasaun no alegasaun Ministerio Publiku (MP) ba kazu abuzu sexual refere mak artigu 290 pontu (3e) Kodigu Penal aplikavel ne'ebe regula kona ba abuzu sexual hasoru labarik ne'ebe mak idade seidauk to'o 15 anos.

Bazeia ba akuzasaun husi MP, iha tinan 2002 arguidu ne'ebe agora dadauk nia tinan 56 anos, komete ona krime abuzu sexual ida hasoru labarik foin tinan 3 no iha surat akuzasaun ba kazu refere rejista ona iha TDS ho numeru prosesu 32/PEN/2005/TDS. Tuir mai, iha tinan 2008, arguidu komete fila fali krime ne'ebe hanesan hasoru labarik foin tinan 8. Ba kazu segundu ida ne'e, tuir horariu loloos atu julga iha loron 16 Marsu 2009 ho numeru prosesu 123/PEN/2008/TDS maibe la konsege prosesa ba kazu ne'e no adia fali ba fulan Junho 2009.

Iha julgamentu laran, tantu MP no defensores sira hato'o pedidu ba juiz koleтиву ne'ebe lidera prosesu julgamentu hodi adia julgamentu ho argumentu katak tribunal tenke prosesa uluk lai kazu 2002 no iha desizaun ona mak foin bele prosesa fali kazu 2008. Iha intervensaun juiz koleтиву deklarara katak kazu 2002 nunka ou to'o agora seidauk prosesa tanba la iha kuñesementu diak ba

atendimentu kazu ne'e wainhira iha sirkulasaun juiz ne'ebe kaer kazu refere, signifika katak kazu 2002 uluk juiz internasional ida mak nu'udar juiz da kauza/ou kaer kazu ne'e maibe wainhira juiz refere nia kontratu remata, laiha reportajen/transferensia konaba progressu prosesual kazu 2002.

Ho razaun hirak iha leten, parte MP no defensores sira husu ba tribunal atu junta deit surat akuzasaun ba kazu rua ne'e ho surat akuzasaun ida deit ho argumentu ida katak arguidu komete krime hanesan maske hasoru vitima diferente.

Ba kazu 2008 arguidu hala'o ona prizaun preventiva husi fulan Outubru tinan kotuk kedas, tanba nune'e iha loron 16 Marsu tribunal fo liberdade kondisional ba arguidu hodi hein kontinuasaun prosesu julgamentu.

JSMP hare katak sirkulasaun ou juiz internasional sira ne'ebe troka malu hela deit tanba kontratu remata hamosu impaktu makas ba prosesu julgamentu no sei kria vantajen no oportunidade bo'ot ba arguidu sira atu repete fali sira nia hahalok krime tanba sente laiha prosesu hasoru sira.

Atu hetan informasaun kompletu bele kontaktu :

Luis Oliveira Sampaio

Diretur Eksektivu JSMP

E-mail: luis@jsmp.minihub.org

Landline: 3323883